

四庫全書

集部

欽定四庫全書

文忠集卷一百十五

玉堂類藁十五

宋 周必大 撰

雜奏告祈謝青詞朱表

旦望表本附

乾道六年

郊祀大禮預告天慶觀開啟道場青詞

九月十

七日

欽承上帝固專人事之修交舉盛儀必假天時之相茲

竭誠于穀旦以徼福于先期仰賴監觀迄臻况施

滿散朱表

伏以奉珪奠幣將歛泰壇隆祉儲祥預祈道蔭交精稷  
于九天之上鬯清明于三日之間倘迄嚴禋虔昭祀事

郊祀大禮太一宮預告祈晴青詞

十月十一日

伏以事之大者禮必嚴誠之勤者文亦稱故三歲一郊  
之親祀有千官萬旅之駿奔是資景氣之晏溫庶竭齋  
明而寅奉預祈冲監垂聽忱辭假霽色于隆冬考盛儀

于至日

滿散朱表

伏以大祀一純在丹表之當勉美光三燭捨洪造以疇  
依肆祗祓于壇場仍備遵于科式冀憑道妙丕錫神休  
迄臻天日之清明獲拜乾坤之况施

又

伏以陰陽大柄造化所專燎瘞上儀國家攸重欲休祥  
之來格在祈禱以備殫三光宣精倘開于霽景七日來

復斯迄于嚴禋

大禮畢告謝天慶觀青詞

伏以祗率臣工躬修郊類荷高靈之純嘏致熙事之慶  
成竊內省于菲涼益重懷于兢畏乃涓穀旦祗祓殊庭  
庶憑清靜之緣少答龐鴻之貺更祈道蔭永阜民生

滿散朱表

伏以承天之序祗荷于監觀饗帝于郊恪伸于昭報慶  
上儀之獲展戴洪造以彌深不假熏修曷殫悃幅茲載

陳于嘉薦庸仰格于真游庶迪神休永綏邦祚

加上太上尊號奏告天慶觀景靈宮報恩光孝

觀青詞

伏以講上儀于三歲俯愧德馨加榮號于二親仰圖美  
報實廣昊穹之賜敢矜涼菲之能將舉彌文預伸昭告  
冀承顏之有永俾曼壽之無疆

乾道七年

立皇太子奏告天慶觀景靈宮報恩光孝觀青

詞 二月十日

伏以枚卜親賢命居儲副以助承于宗廟以係望于華夷祇達誠心聿陳芳薦冀神游之昭格錫邦祚之延長

淳熙二年

加上太上尊號奏告天慶觀景靈宮報恩光孝

觀青詞

伏以耆艾熾昌帝與齡而可卜鋪張揚厲臣歸美以當然不崇父母之鴻名孰顯天人之並况茲敬涓于陽復

將備講于禮容祇告先期并徼後福

淳熙三年

立皇后奏告天慶觀景靈宮報恩先孝觀青詞  
伏以表正宮庭久勤婦職登崇位號倣正后儀已涓冊  
授之期正賴帝臨之况茲惟盛典預薦精誠

郊祀大禮奏告景靈宮青詞

伏以觚壇至日以躬郊將舉合禘之禮原廟先期而朝  
獻具存分詣之儀祇命臣工敬瞻像設冀博恢于慈造



庸克相于嚴裡

淳熙四年

仲春醮祭吳山忠壯英烈威顯王青詞

伏以江海遙連久朝宗于都會風濤相激常軫慮于民  
居當玉琯之分春即靈祠而藏事伏願天心有相神力  
無邊約潮汐以安行屹堤防而增固

太常寺進呈安奉仁宗皇帝玉牒徽宗皇帝實

奏告景靈宮青詞

三月九日

伏以仁廟萬年之寶牒甫就編摩佑陵一代之政經載  
嚴纂錄皆國家之攸重繫祖烈之有傳安奉匪遙啟聞  
敢緩並告汗青之日尚孚精白之心

仲秋醮祭吳山忠壯英烈威顯王青詞

伏以海率再潮獨抵錢塘而聲振歲分四序每乘秋氣  
而勢雄矧屬時巡實蕃生聚即神祠而熏祓資道蔭以  
禱祈庶憑上善之緣永作下民之佑帆樯隱隱有利于  
往來隄岸迢迢無憂于齧缺

淳熙五年

仲春祭吳山忠壯英烈威顯王青詞

伏以濤聲動地喧虺萬竅之風雷浪勢黏天指頌千堆  
之霜雪匪資帝力孰奠民生卜春瑄之平分啟醮筵而  
祇祓仰賴神明之相潛施約束之功自海而江水常行  
于無事惟舟及岸人胥勉于他虞

仲秋祭吳山忠壯英烈威顯王青詞

時巡歲久生齒日繁當古今潮汐之衝聚億萬室廬之

衆諒非陰相孰底奠居卜秋序之平分即祠庭而祇  
底依乘于道蔭益恢廓于神功波浪排空巨岸弗摧于  
激射舳艫銜尾行人永保于寧安

淳熙六年

仲春祭吳山忠壯英烈威顯王青詞

伏以萬古波濤中分二瀨一時形勢密拱九重繫潮汐  
之安行賴聰明之顯相茲臨春仲爰舉邦彛即祠宇以  
禘除啟醮筵而祈報奠帝臨之有赫助神力之無窮朝

宗彌廣于前功軌道更綏于後福

仲秋祭吳山忠壯英烈威顯王青詞

伏以錢塘之潮盧肇所賦謂奔騰獨起視衆水以特殊  
故滂霈自興當仲秋而尤盛粵從巡狩滋劇雄觀爰即  
靈祠夙遵道範伏願天心降格神力扶持波濤無薄激  
之虞岸谷共安平之利

淳熙七年

玉牒所玉牒殿安奉仁宗皇帝哲宗皇帝玉牒

前一日景靈宮奏告青詞

四月四日

伏以續仁祖之信書又成十載刊泰陵之舊牒將詔萬年既尊閣之有期在啟聞而敢怠仰祈靈鑒垂佑丕圖

乾道六年

郊祀大禮禮畢奏謝景靈宮萬壽觀聖祖天尊大帝元天大聖后昊天玉皇上帝表詞本

伏以時當三載氣應一陽帝命不違成國家之熙事天休滋至泱雨露之湛恩允賴博臨敢云能饗爰按冲科

之式少伸昭報之誠

郊祀大禮禮畢奏謝景靈宮萬壽觀會聖宮應  
天啟運宮章武殿永佑陵殯宮昭慈聖獻皇  
后殯宮諸帝后表詞本

伏以天地神祇既講合祫之禮祖宗功德又修徧饗之  
儀惟降嘏之孔皆賴發祥之云遠若稽舊典祇薦忱辭  
以昭有相之功以答無疆之惠

郊祀大禮禮畢奏謝昭慈聖獻皇后殯宮永佑

陵殯宮表文

伏以下歲習祥迎陽徧饗既受百神之况亦均四海之  
釐仰賴遺休迄成鉅典稽舊章而致告望拱木以馳情

郊祀大禮禮畢奏謝諸陵表文

共二十九通  
十二月十日

臣

御名

言伏為郊祀大禮禮畢奏謝者伏以南極景長

載陳掃地之祭西陵裡隔遙想在天之靈既迄曠儀益  
懷遺烈稽舊章而致告真靈眷之永孚

加上尊號奏告諸陵表文

共二十九通



臣御名言伏為大禮慶成加上光堯壽聖憲天體道太  
上皇帝壽聖明慈太上皇后尊號寶冊前二日奏告者  
伏以嚴儀郊廟既不墮于繁禧歸美庭闈肆並加于顯  
號若時慶典實越前聞遙瞻如在之靈敢致先期之禱  
冀孚誠意益佑昌圖

奏告永佑陵殯宮四通昭慈聖獻皇后殯宮表

文一通

詞並同前

但改遙瞻作式瞻

乾道七年

昭慈聖獻皇后及永佑陵殯宮補種窠木修飾

上下宮奏告表文

正月二十四日

伏以藏衣冠于禹穴久寓神遊行北域于漢陵具存邦  
典繕修惟舊封殖以時將並飭于衆工尚永綏于靈碩  
奏告顯恭皇后表文

伏以瞻園陵于洛邑雖阻畿疆祔宮寢于稽山具存北  
域繕修惟舊封殖以時將並飭于衆工尚永綏于靈碩

仲春薦獻紹興府兩殯宮表文

二月十三日

臣

御名

言伏以歲華逾邁春律載中寢廟獻羔已遵于

呂令陵官掌祭更講于漢儀遙伸追遠之誠庶盡奉先  
之孝

仲春薦獻諸陵表文

臣

御名

言伏以歷正仲春感載濡于雨露心馳西洛悵

遐阻于山河恭惟尊謚皇帝臨鑒在天聖謨垂後

皇后  
改作

徽音  
垂後

秩上陵之典禮徒切望思絕寓祭之權宜愈增愴

慕

淳熙二年

加上太上尊號奏告諸陵表文

共二十九通

伏以俾壽而昌慶庭闈之難老惟名與器偕年德以俱  
新卜一陽云復之辰講三代未行之禮茲為國家之盛  
必契神靈之心願監忱誠並流丕祉謹差某官奉表奏  
告以聞

立皇后奏告諸陵表文

二十四通同一詞

伏以禮經貽訓國治本于家齊易象垂文外正由于內  
職是求邦媛就正坤儀念典冊之將行諒神靈之咸喜  
遙瞻陵寢預薦菲誠

修奉昭慈聖獻皇后下宮重換殿中間後步望  
板并神帳上雲板損折及帳前微有漬黑畢  
工奏告遷神御還殿正奉安表文

伏以再造皇家內資隆祐之助肇營仙寢近寓稽山之  
原比稍飾于下宮常暫遷于遺像速茲還御敢不薦誠

顯肅皇后殿皇堂磚面低陷開裂奏告表文

伏以南渡權宜卜會稽之陵寢上宮備設棲顯肅之神  
游而殯殿之間皇堂之上微聞陷裂亟謹修營仰惟如

在之靈鑒乃奉先之禮謹差某官奉表奏告以聞臣

御

名誠惶誠懼頓首頓首謹言

六月初十日緝量到上宮殯殿御倚子并茶床

下當中磚面低陷五寸西南角起裂六寸東南

角起裂二寸東西共濶一丈有餘南北長五尺

有餘當日西時皇堂地面聲響其御倚子開裂  
一處陷御踏子不見并御倚倒側及東西角起  
裂磚面各約高一丈

淳熙五年

仲春繕修補種昭慈聖獻皇后殯宮永佑陵殯

宮表文 共六道同一詞

臣御名言伏以宸遊寢邈仙寢具存當春律之告中飭

陵官而按舊宮庭器服咸謹于繕修兆域松栞並從于

補治仰綏靈頤遙致忱衷

景靈宮諸神御并永佑陵殯宮昭慈聖獻皇后

殯宮會聖宮等諸帝旦表

閏六月

臣御名言伏以林鐘之律六寸于今一氣之未移梧桐

之葉十三在昔九州之不異恭惟尊號皇帝仁周品彙  
德邁古初仙馭賓空闕衣冠而愈久靈威燾後偕正閏  
以常新

諸后旦表

同前



臣御名言伏以暑徂六月斗指兩辰居門雖詔于周官  
告朔當朝于魯廟恭惟尊號皇后德隆坤順本合乾剛  
邈矣徽音方貽百歲之範悵焉舊典空備五時之衣

諸帝望表

同前

臣御名言伏以鶉火昏中仍退棲于酉位蟾輝夕滿繇  
積數于陽餘恭惟尊號皇帝德澤在民規摹裕後周年  
過卜敢忘文武之功堯歷授時尚想義和之政

諸后望表

同前

臣御名言伏以温風浹至遶臨小備之期皓月載圓追  
感太陰之照恭惟尊號皇后協功列聖流慶後人彤管  
光輝已著無窮之聞玉衣寂寞惟深如在之思

明堂大禮畢奏謝景靈宮萬壽宮會聖宮應天  
宮應天啟運宮章武殿永祐陵殯宮昭慈聖  
獻皇后殯宮諸帝后表詞本

伏以蒐講曠儀潔蠲路寢乘季秋之肅氣攄宗祀之精  
誠茲荷監觀備臻况施恪伸昭謝庸告熙成仰冀在天

之靈益綏裕後之福

明堂大禮畢奏謝聖祖天尊大帝元天大聖后

昊天玉皇上帝表文

伏以萬寶成秋九筵稽古旁資四海之助上接三神之  
觀翕臻休祥昏賴鴻造載陳誠悃昭答監觀


明堂大禮畢奏謝昭慈聖獻皇后殯宮永佑陵  
殯宮表文

伏以大饗明堂格王之盛則度筵路寢列聖之宏規逮

臻典禮之成知契神靈之意載瞻仙寢近在稽山祇達  
封章恪伸謝悃尚監奉先之敬永垂裕後之恩

奏謝諸陵表文

伏以大饗明堂格王之盛則度筵路寢皇祐之宏規聿  
臻典禮之成必契聖神之意逖瞻仙寢遠在洛師遙貢  
封章恪伸謝悃尚監奉先之敬永垂裕後之恩



文忠集卷一百十五

欽定四庫全書

集部

文忠集卷一百十六

七六

詳校官庶吉士臣李傅熊

主事臣呂雲棟覆勘

總校官進士臣楊懋珩

校對官學正臣李巖

謄錄監生臣李元位

欽定四庫全書

文忠集卷一百十六

玉堂類彙十六

宋 周必大 撰

大禮御札

大禮冊文國書  
致賀宣答詞附

淳熙三年

郊祀大禮御札

六月五日

勅內外文武臣僚等天地有覆載生成之德非精禋無以伸報本之誠祖宗有光明盛大之功非陟配無以展

奉先之孝粵若累朝之定制具嚴三歲之親祠既疏數  
之適中亦情文之備舉自予纂紹彌極寅恭四行郊廟  
之儀久荷神天之况親庭萬壽方開七十載之祥農晦  
屢豐幾有再三登之象外則邊陲之綏靖內焉民俗之  
阜康願誠感之甚昭曷宗祈之敢怠乃卜陽來之旦載  
殫躬見之勤庶永祚于家邦且祝釐于夷夏誕孚羣聽  
明戒先期朕以今年十一月十二日謁款于南郊咨爾  
攸司各揚乃職相予肆祀罔或不恭故茲札示想宜知



悉

大禮冊文

乾道六年

郊祀大禮前二日朝獻景靈宮聖祖天尊大帝

冊文

伏以赫赫有宋受天明命發祥流祉肇自聖德猥以寡  
昧紹承慶基報本奉先疇敢不懋日至之吉將見上帝  
前期朝獻有飶其香對越在天昭假不違于萬斯年裕

後無極

前一日朝享太廟祖宗帝后冊文

伏以物本乎天人本乎祖自古在昔假廟乃郊粢惟涼  
德獲纂丕緒爰卜景至大報反始祇見厥祖裸以圭瓚  
列聖如在優然肅然烝享苾芬神保是格有秩斯祐于  
時薦之

前一日朝享太廟別廟懿節皇后冊文

伏以懿範在天徽音有嗣寧神別廟列年于茲綏予孝

子親纂堯緒既齋既戒大旅于郊先事薦禋厥有彝典  
豆籩維楚幣玉維潔和樂九變誠心是孚其德不回降  
福來格

郊祀大禮祭享昊天上帝冊文

十一月六日

伏以大哉乾元實祖羣物包含徧覆陰隲下民欽惟歷  
數屬在冲眇寅畏寶命不敢怠違歲當躬郊精意以享  
高高在上聽卑悲忱事親保民申以眷佑期懋厥德永  
承天休

郊祀大禮祭享皇地祇冊文 同前

伏以直方而大沈潛而剛含生賦形罔不持載猥以寡  
昧司牧黎元夙夜祇畏期贊化育仲冬景至合祭維時  
有黜斯牲有黃斯琮在誠雖孚物則奚稱來頌來祐永  
綏萬邦

郊祀大禮太祖配享冊文 同前

伏以布昭聖武造我區夏燕及皇天啟佑後人肆惟涼  
菲獲承大器勉夙夜懼忝前烈躬執圭幣三熙紫壇

思文我祖克配以妥鍾石純繹豆籩靜嘉庶其碩歆茂  
介繁祉

郊祀大禮太宗配享冊文

同前

伏以天祚炎德二后受之丕承文謨無競武烈積善垂  
裕逮於冲眇仲冬至習歲維祥言登郊丘于薦牲玉  
齋明內竭禮樂外舉神祇來格陟配在上既右伊嘏永  
言保之

淳熙三年

郊祀大禮前二日朝獻景靈宮聖祖天尊大帝

冊文

維淳熙三年歲次丙申十一月壬寅朔十日辛亥嗣皇

帝臣御名謹再拜稽首上啟聖祖上靈高道九天司命

保生天尊大帝伏以郊之為祭大報反始惟我國家本

支百世如海浩浩發源也長如木彬彬植根斯久施及

涼昧獲典神天將秩元祀禮有來獻開先之德既弗敢

諼燾後之功尚永厥福謹言

前一日朝享太廟祖宗帝后冊文

維淳熙三年歲次丙申十一月壬寅朔十一日壬子孝

曾孫嗣皇帝臣

御名

敢昭告於帝后伏以天地之祭宗

廟之事著在禮器是之謂倫維德弗類纂承祖烈下以

日至爰熙紫壇於穆清廟夙致孝享牲用角握舞用九

磬羣工駿奔四海來助威靈如在綏我思成謹以嘉玉

量幣一元大武柔毛剛鬣明粢薌合薌其嘉蔬嘉薦脩

成熙事尚饗

郊祀大禮祭享昊天上帝冊文

維淳熙三年歲次丙申十一月壬寅朔十二日癸丑嗣

天子臣

御名

敢昭告於昊天上帝伏以古先哲王奉若

天道或以馨治感于神明或以翼心昭事上帝內循寡

昧敢曰能知惟是親郊欽迪彝典貴誠尚質匪修其文

犧牲既成煙燎既達庶無罪悔用保乂民謹以玉帛犧

齊粢盛庶品肅展禋祀式昭誠欽太祖啟運立極英武睿

文神德聖功至明大孝皇帝太宗至仁應道神功聖德



文武睿烈大明廣孝皇帝配神作主尚饗

郊祀大禮祭享皇地祇冊文

維淳熙三年歲次丙申十一月壬寅朔十二日癸丑嗣

天子臣

御名

敢昭告於皇地祇伏以坤德無疆何生不

育竭誠冬報其敢憚勞合祭國南視古泰折勅躬齋戒

嘉服上黃方鼎平琮靈茅瑞稷庶幾宴享賚以蕃釐時

和歲豐邇安遠至舉歸持載敬用禱祈謹以玉帛犧齊

潔盛庶品消選休成肅若舊典太祖啟運立極英武睿

文神德聖功至明大孝皇帝太宗至仁應道神功聖德  
文武睿烈大明廣孝皇帝配神作主尚饗

郊祀大禮太祖配享冊文

維淳熙三年歲次丙申十一月壬寅朔十二日癸丑孝

曾孫嗣皇帝臣御名敢昭告于太祖啟運立極英武睿

文神德聖功至明大孝皇帝伏以蒼籙肇基功推后稷

三分有二德在文武既配彼天亦配上帝惟我藝祖功

德兼隆創業垂統有光在昔闕歲郊祀對越神祇子孫

保光敢不駿惠卜年過歷期邁有周謹以制幣犧齊粢  
盛庶品脩成熙事侑神作主尚饗

郊祀大禮太宗配享冊文

維淳熙三年歲次丙申十一月壬寅朔十二日癸丑嗣  
皇帝臣御名敢昭告于太宗至仁應道神功聖德文武

睿烈大明廣孝皇帝伏以資生資始覆載難名丕顯丕  
承謨烈可紀於乎二后肇造我家中壇合祀久矣並侑  
茲迎日至載嚴上儀金石昭融犧牲博碩神哉虞億是

饗是宜垂休無窮以介景福謹以制幣犧齊粢盛庶品  
備成熙事侑神作主尚饗

淳熙六年

明堂大禮朝獻景靈宮聖祖天尊大帝冊文

淳熙六年歲次己亥九月丙辰朔十四日己巳嗣皇帝

臣御名謹再拜稽首上啟聖祖上靈高道九天司命保

生天尊大帝伏以肇啟真緒源深流長顯承休符錫祚  
無極施及涼昧纂承丕圖明堂孔陽將舉禮典言趨秘宇

祇薦令芳既開其先必裕乃後敢忘勵翼永紹淵宗謹  
言

前一日朝獻太廟祖宗帝后冊文

維淳熙六年歲次己亥九月丙辰朔十五日庚午孝曾  
孫嗣皇帝臣御名敢昭告于祖宗帝后伏以三歲親祠

我家盛禮內循菲德祇適彛章穆卜季秋肇禋陽館先  
期假廟備飭齋誠羣工駿犇以職來助鬱尊灌鬯樂舞  
振庭對越在天淳熙用介謹以嘉玉量幣一元大武柔

毛剛鬣明漆薌合薌箕嘉蔬嘉薦式陳明薦尚饗

前一日朝享太廟別廟懿節皇后冊文

維淳熙六年歲次己亥九月丙辰朔十五日庚午孝子

嗣皇帝臣御名敢昭告于皇妣懿節皇后邢氏伏以十

亂之功獨尊文母賓空雖久遺範故存卜歲習祥禮行

世室臨裸別廟優然懷思笙鏞繹純籩豆豐潔歆時孝

享垂佑家邦謹以下同前

明堂祭享昊天上帝冊文

維淳熙六年歲次己亥九月丙辰朔十六日辛未嗣天子臣御名敢昭告于昊天上帝伏以惟皇無私臨下有赫親德饗道聰明自民惕惟菲躬祇荷眷佑五修郊報浹宇又安載稽舊章俶講宗祀物難仰稱誠或居歆迄用康年敢忘寅畏謹以玉帛犧齊粢盛庶品肅展禋祀式昭誠欽太祖啟運立極英武睿文神德聖功至明大孝皇帝太宗至仁應道神功聖德文武睿烈大明廣孝皇帝配神作主尚饗

國書

乾道六年十月答金國賀會慶節

使耶律子敬副張僅言

遠馳使傳申講邦儀記載育之初辰持達嘉貺堅無窮之永好用敷羣生式循厚意之臨奚喻感悰之切氣鍾寒律福介時和

乾道六年十一月遣使賀來年正旦

使呂正巳副辛堅之

贛陽布德天回萬宇之春講信親仁

闕

結兩朝之好旅

陳禮幣臨遣使車既因物以見誠亦順時而善頌冀綏



純嘏永底泰和

乾道七年正月答賀正旦

使富察愿  
副韓綱

斗柄東回誕布始和之令星軫北至載通修睦之懽書  
語溫然幣儀腆甚方益隆于世好知丕擁于春祺欣感  
交懷喻言靡究

乾道七年正月遣使賀生辰

使趙雄  
副趙伯駒

景淑三春式屆誕彌之節壽先五福敢伸善頌之誠預  
遣使軫遠持慶幣用祝後天之筭冀延卜世之期共庇

黎元永堅盟好

乾道七年十月答賀會慶節

使烏凌噶天錫  
副李文蔚

三冬紀孟適臨載誕之期兩國交歡方重益親之義遠  
勤信使寵畀慶儀味詞意之加隆激感悰而彌厚寒威  
協序吉履增休

乾道八年正月遣使賀生辰

使翟紱  
副祖士榮

履初吉于季春素傳令節開殊祥于甲觀茲記誕辰方  
交阜于羣生宜丕延于多祉肅馳使傳虔致壽儀惟頌

詠之彌勤非喻言之可究

淳熙二年十月答賀會慶節

使完顏禧  
副盧璣

陽月應期記菲涼之載育親仁修睦勤使介以俱來肆  
形盟好之言脩致壽祺之祝情詞至厚儀物兼豐在感臆  
以增深豈緘書之能究

淳熙二年十一月遣使賀來年正旦

使謝廓然  
副黃夷行

乾坤交泰熙和氣于春臺南北通歡躋庶民于壽域遠  
馳信使虔致慶儀真臻視履之祥庸對發生之序頌言

斯至敷述奚殫

淳熙三年正月答賀正旦

使完顏治  
副高運國

歲序載新允協夏時之正民生交阜共欣春物之榮已  
遠致于慶儀乃專勤于華使披緘書之甚厚閱禮幣之  
維豐感篆彌深願言曷究

淳熙三年十一月遣使賀來年正旦

使閻蒼舒  
副李可久

行夏之時方肇新于歲律受天之祐宜丕集于春祺飭  
遣使人肅將禮幣庸展泰享之慶益堅鄰好之修頌詠

居多喻言曷究

淳熙四年正月答賀正旦

正月日大宋皇帝謹奉書于大金應天興祚欽文廣武  
仁德聖孝皇帝闕下新元肇紀慶萬物之發生舊好益  
堅嘉羣黎之康阜遠勞信使寵貺華絨既備及于春祺  
復旅陳于禮幣欽紉勤渠之意良深感懌之情今正旦  
使副回謹專奉書陳謝不宣

淳熙四年十一月答賀會慶節

使完顏忠  
副曹士元

時屬上冬日臨載育勤使華于萬里締盟好于億年况以緘書申之篚幣惟慶儀之甚腆知眷意之加隆其在感藏曷勝敷叙

淳熙四年十一月遣使賀來年正旦

十一月日大宋皇帝謹奉書于大金應天興祚欽文廣武仁德聖孝皇帝闕下樂歲載新慶三陽之交泰歡盟彌固與萬物以皆春飭遣輅車肅持菲幣奠緝熙于繁祉共康乂于黎元頌詠良深敷陳罔既今差翰林學士

朝請大夫知制誥兼侍讀普寧郡開國侯食邑一千戶  
食實封一百戶賜金紫魚袋錢良臣嚴州觀察使知閤  
門事兼客省四方館事永豐縣開國伯食邑七百戶延  
璽充賀正旦國信使副有少禮物具諸別幅謹專奉書  
不宣

淳熙五年正月答賀正旦

二儀交泰歷頌歲序之元萬景向榮人遂春臺之樂遠  
紆使傳申締歡盟昭厚意于緘書祭多儀于信幣其為

感懌未易敷陳

淳熙五年正月遣使賀生辰

某月日大宋皇帝謹奉書于大金尊號皇帝闕下月紀  
季春屬光風之轉蕙日臨初吉應飛電之繞樞祗遣使  
旌興陳慶幣永奠萬年之筭常通兩國之歡頌詠惟勤  
措陳莫喻今差朝散大夫試禮部尚書信安郡開國侯  
食邑一千戶食實封一百戶賜金紫魚袋趙思某州觀  
察使知閤門事兼客省四方館事某縣開國伯食邑七



百戶鄭槐充賀生辰國信使副有少禮物具諸別幅謹  
專奉書不宣

淳熙六年正月遣使賀生辰

春華正茂暢和氣于芳辰誕序載臨對休符于令旦肅  
馳使傳備展慶儀冀萬壽之丕延底羣生之交阜茲為  
頌詠豈易敷陳今差龍圖閣學士朝散大夫提舉祐神  
觀兼侍講清化郡開國侯食邑一千戶食實封一百戶賜  
紫金魚袋錢冲之潭州觀察使知閤門事兼客省四方

館事泰寧縣開國伯食邑七百戶劉咨充賀生辰國信使副有少禮物具諸別幅謹專奉書不宣

致賀并宣答詞

乾道六年

郊祀大禮畢端誠殿受賀內侍答管軍詞

有制氣應黃鐘禮行紫時賴爾摠提于七萃俾予祇肅于一純既迄嚴禋乃旋齋幄禮成之慶與卿同之

閣門宣答樞密詞

有制于廟于郊有嚴躬祀如幾如式無媿祝辭賴樞機  
顯相之功拜穹昊博臨之貺

下同前

樞密宣答宰臣詞

有制朕親駕竹宮欽修柴燎繫上公之協贊率多士以  
駿奔天地居歆人神咸喜

麗正門肆赦閣門宣答宰臣詞

有制陽陔踐豆已成饗帝之能端闕旋衡遂廣配天之  
澤敷錫之慶與卿等同之

乾道七年

加上太上皇帝尊號冊寶行禮畢皇帝致詞賀

太上皇帝

正月

皇帝臣稽首言伏惟光堯壽聖憲天體道太上皇帝陛下  
下茂對春元載膺榮號二儀並貺萬壽無疆

侍中承旨宣答

光堯壽聖憲天體道太上皇帝聖旨皇帝俞受漢登懋  
昭舜孝自欣之子勉對隆名

皇帝致詞賀太上皇后

皇帝臣稽首言伏惟壽聖明慈太上皇后博厚承天輝  
光遡日隆名並受薄海同歡

內侍承旨宣對

壽聖明慈太上皇后聖旨皇帝儲休郊廟歸美庭闈力  
避無從靜言有愧

太傅率文武百僚稱賀太上皇帝詞

具官臣某等稽首言伏惟光堯壽聖憲天體道太上皇

帝陛下律應丕天名增太極彰元后事親之事符封人  
祝聖之心

侍中承旨宣答

光堯壽聖憲天體道太上皇帝聖旨迫于勤請益此徽  
稱禮冠古初慶均家國

皇太子受冊畢班首文武百僚稱賀皇帝詞 三

月二十三日

臣某等言伏惟皇帝陛下乾健無窮離明有助消辰授

冊浹宇均懽臣等幸列班聯尤深慶忭

侍中承旨宣答

朕惟懷永圖豫建太子億寧方夏鞏固宗祧典禮備成  
與卿等同慶

淳熙二年

加上太上皇帝尊號冊寶行禮畢皇帝致詞賀

太上皇帝 十一月

皇帝臣御名稽首言伏惟尊號太上皇帝陛下壽同天

永名與日新典冊揚輝華夷賴慶

左丞相承旨宣答

尊號太上皇帝聖旨皇帝迎陽展采鏤牒榮親何幸吾  
身屢親盛事

皇帝致詞賀太上皇后

皇帝臣御名稽首言伏惟尊號太上皇后殿下輔佐父

慈恢隆母道載鋪懿鏢允協嘉祥

內侍承旨宣答



尊號太上皇后聖旨皇帝誠心備著榮號頻加盛典之  
成慈懷以懌

皇太子率文武百僚致詞稱賀太上皇帝

皇太子臣某等稽首言伏惟尊號太上皇帝陛下承天  
之佑益延安樂之年迎日之長載受鋪張之冊邦家大  
慶臣庶同歡

左丞相承旨宣答

儀物充廷簪紳在列名雖予得慶則汝同

皇帝詣德壽宮慶壽致詞賀太上皇帝

十二月

十七日

皇帝臣

御名

稽首言天佑君親錫茲難老惟春之吉年

德加新臣

御名

與羣臣等不勝大慶謹上千萬歲壽

侍中承旨宣答

酌此春醪介予眉壽家邦盛事允憑慈懷與皇帝并百  
僚內外同慶

淳熙三年

皇后受冊畢內命婦稱賀詞語 十月

伏覩授冊楓宸流徽椒極權均六寢美繼二南恭惟皇  
后殿下慈惠儉勤柔明莊裕誕膺金璽增煥玉衣妾等  
幸比貫魚獲陪賀燕願益遵於嬪則庶永賴于母儀

外命婦稱賀詞語

伏覩壺儀內正王化外基地道有光人心胥悅恭惟皇  
后殿下覩天表異夢月開祥久佐聖明椒膺典冊妾等  
並依持載欣預榮觀昔聞恭儉于母家今見化成于婦

道

郊祀大禮畢端誠殿稱賀樞密宣答皇太子以

下詞

有制朕輯古盛儀躬郊吉事惟儲副謹貳觴之獻惟臣  
鄰陪肆祝之恭上帝博臨百神受職禮成之慶與卿同  
之

閣門宣答樞密已下詞

有制登泰畤以展儀甫成鉅典即甘泉而受賀爰舉舊

章有嘉樞近之臣實致齋明之助禮成之慶與卿等同之

內侍宣答管軍詞

有制一純二精載秩欽柴之祀千乘萬騎備觀扈蹕之勞旅賀于庭益嘉乃志禮成之慶與卿同之

郊祀大禮畢登門肆赦稱賀宣答皇太子以下

詞

有制壇飭紫宮備成禋禮樓登丹鳳丕錫湛恩坐令夷

夏之民均被乾坤之貺若時大慶與卿等同之

淳熙四年

進呈仁宗皇帝玉牒徽宗皇帝實錄今上皇帝  
玉牒畢宣答提舉官已下詞

有制一朝大典纂述有年逮茲奏篇足以傳遠禮成之  
慶與卿同之

淳熙六年

明堂大禮畢皇帝詣德壽宮上壽飲福致詞賀

太上皇帝

皇帝臣

御名

謹率文武百僚稽首言饗帝合宮受天純

嘏

御名

與百僚等不勝大慶謹上千萬歲壽

侍中承旨宣答

太上皇帝聖旨得皇帝壽酒與皇帝并百僚內外同慶

文忠集卷一百十六



欽定四庫全書

文忠集卷一百十七

玉堂類藁十七

宋 周必大 撰

祝香文

祝文祭文附

乾道六年

大禮畢車駕詣景靈宮恭謝祝香文

十一月二

十七日

今皇帝嚴事泰壇已拜慶成之况告虔原廟載昭垂裕

之功供養聖祖天尊大帝伏願帝皇盛德日新純休天  
錫益介萬年之壽永觀四海之安稽首歸依無極大道

乾道七年

孟春車駕詣景靈宮朝獻祝香文

孟春屆候法駕親臨恭焚寶香供養聖祖天尊大帝伏  
願皇帝堯天徧覆舜日光昭庶民咸樂於熙臺萬物均  
陶於暖律皇圖有永睿算無窮稽首歸依無極大道

孟夏車駕詣景靈宮朝獻祝香文

孟夏

同前

伏願皇帝法天覆燾如日照臨敦慈寶以示  
民運道樞而應物炎圖愈赫鴻筭彌長

孟冬車駕詣景靈宮朝獻祝香文

孟冬

同前

伏願皇帝威加四海慶協三靈頻書大有之  
年永錫無疆之壽溥均和氣胥暨羣倫

乾道八年

孟春車駕詣景靈宮朝獻祝香文

同前

伏願皇帝仁恩無外聖澤如春運一氣於化樞納

萬方於壽域永膺純祐翕受繁祉

淳熙二年

孟冬車駕詣景靈宮朝獻祝香文

同前

伏願皇帝仁施寒谷威震朔方散和氣於康年協嘉祥於良月坐使敷天之衆常傾愛日之心

淳熙四年

孟春車駕詣景靈宮朝獻祝香文

同前

伏願皇帝德參覆載恩冒華夷一氣熙春無匹夫

之不被萬年御歷與太極以常尊

孟夏車駕詣景靈宮朝獻祝香文

同前

伏願皇帝并包中夏茂對正陽清微之風常長養  
于庶物舒長之日永照臨于四方

孟秋朝獻祝香文

同前

伏願皇帝德威遠暢聖業光隆億萬斯年燦壽星  
于南極十千維耦歌樂歲于西成

孟冬朝獻祝香文

同前 伏願皇帝恩加動植教暨朔南十月為陽誕節慶  
堯年之永三登曰泰頌聲歌周稼之豐

乾道六年

郊祀大禮奏告五嶽祝文

三歲親祠國之大事瞻言嶽鎮素赫威靈陰相之功齋  
心以冀

奏告四瀆祝文

國祭大川禮經所載矧當禋祀敢緩虔祈冀効珍符協

成熙事

郊祀大禮添修雅飾太廟殿宇等畢工告遷祖

宗帝后神主并別廟神主還殿室時前奏告

祝文 一十三首同一詞

伏以郊數載修宗祊來格沈沈之厦奕奕以新將奉真  
游言旋禘室威靈在上敢不告虔

別廟時前奏告懿節皇后祝文

躬郊之歲親饗闕宮預謹繕修聿觀輪奐速茲迄事將

安神棲敬舉舊章先時以告

安穆皇后安恭皇后祝文

將祀郊丘乃臨廟室攸司庀役祓飾有儀工迄厥成神  
歸于舊先時致告其必安之

雅飾太廟畢工告遷奉安祝文

躬郊至重飾廟為先方庀事之初嘗仰勤于移御逮落  
成之後敢少緩于寧神冀安有恤之宮永錫無疆之祐

別廟正奉安懿節皇后祝文

一首同前



安穆皇后安恭皇后祝文 二首同詞

伏以爰熙郊壇先裸廟寢載瞻舊室加賁新功消日之  
良宅神于是淑靈如在多祉永孚

郊祀大禮禮畢告謝五嶽四瀆祝文 天慶觀

維乾道六年歲次庚寅十一月丁丑朔某日皇帝 御名

伏為郊祀大禮禮畢告謝謹遣入內內侍省西頭供奉  
官李唐弼敢昭薦于五嶽四瀆伏以祗紹鴻基載登圓  
陛盛儀丕就浹宇均歡雖協氣橫流本上帝博臨之應

而美光參燭亦百神陰相之休昭謝有常致誠無斁

郊祀大禮禮畢祭謝南鎮會稽山永濟王祝文  
迎日之長燔柴泰時荷天眷佑熙事慶成仰止名山近  
臨郊甸恪伸昭謝以達誠心尚饗

郊祀大禮禮畢祭謝五嶽四海四瀆祝文

維乾道六年歲次庚寅某月朔日皇帝御名伏為郊祀

大禮禮畢謹遣某官敢昭薦于潭州南嶽司天昭聖帝  
明州東海助順孚聖廣德威濟王廣州南海洪聖廣利

昭順威顯王益州南瀆大江昭靈孚應威烈廣源王伏  
以順迎至景肅展嚴禋咸秩百神哀時之對欽惟四望  
幽贊上儀報謝有常敢忘其舊尚饗

郊祀大禮禮畢祭謝五嶽四海四瀆祝文

係道

未通去處

維乾道六年歲次庚寅某月朔日皇帝

御名

伏為郊祀

大禮禮畢謹遣某官敢昭薦于東嶽天齊仁聖帝西嶽  
金天順聖帝北嶽安天元聖帝中嶽中天崇聖帝西海

通聖廣順王北海冲聖廣澤王東瀆大淮顯佑昭應長  
源王西瀆大河顯聖靈源王北瀆大濟清源王伏以惇  
宗將禮咸秩無文矧惟方望之祠曾是封疆之阻敢告  
成于熙事奠垂鑒于遐悰尚饗

祭謝安穆皇后安恭皇后祝文

二首同詞

維乾道六年歲次庚寅十二月丙午朔十日乙卯皇帝

御名

伏為郊祀大禮禮畢恭遣某官昭薦于安穆皇后

乃者順迎至景祇款泰壇被祭服而思蠶織之功對潔

染而懷種稷之獻暨竣盛禮益愴遺芳致謝有常敢忘其舊

加上尊號冊寶前三日奏告天地祝文二首社

稷祝文二首

不稱臣用御名

太乙宮祝文一首

維乾道六年歲次庚寅某月朔日嗣天子

御名

伏為大

禮慶成加上光堯壽聖憲天體道太上皇帝壽聖明慈

太上皇后尊號冊寶前三日謹遣某官敢昭告于昊天

上帝伏以受禪之始愛敬事親嘗籲衆心並崇徽號逮

今九載三展裡祀德洋恩溥中外闔懌匪加稱謂曷彰  
歸美已諏穀旦將舉禮文邦家大慶不敢不告尚饗

奏告太廟別廟景靈宮祝文

太廟別廟共二十四首景靈宮三首

維乾道六年歲次庚寅某月朔日孝曾孫嗣皇帝臣

御

名伏為 下同前

祭告安穆皇后安恭皇后殯宮祝文

各一首

維乾道六年歲次庚寅某月朔日皇帝

御名

伏為大禮

慶成加上光堯壽聖憲天體道太上皇帝壽聖明慈太

上皇后尊號冊寶前二日恭遣某官昭薦于安穆皇后  
往膺內禪首上鴻名茲成郊廟之慶儀並佩尊親之慈  
訓載崇盛典重衍徽稱命告先期冀孚至意

補種窠木修飾殯宮奏告安穆皇后安恭皇后

祝文

伏以密瞻吉壤實寓殯宮封植加新繕修惟舊先期以  
告奠靈之安

乾道七年

仲春薦獻安穆皇后安恭皇后祝文

維乾道七年歲次辛卯二月丙午朔某日皇帝

御名

恭

遣某官昭薦于安穆皇后春律載中仙輶滋邈悵燕祺  
之在候想翬翟以興懷時祭有常淑靈來碩尚饗

立皇太子奏告天地宗廟社稷宮觀等祝文

天地

二首社稷二首太乙宮一首景靈宮祖宗  
諸帝神御一首諸后神御一首並同詞

維乾道七年歲次辛卯二月丙午朔十日乙卯嗣天子

臣御名伏為立第三子某為皇太子謹遣某官敢昭告



于天地伏以立嗣必子所從來遠矣願惟涼菲奉承聖  
緒而儲副虛位夙夜不敢康選自恭邸進司七幣所以  
永邦圖隆國本也仰祈靈鑒陳錫無疆

宗廟祝文

十一首懿節皇后一首  
安穆安恭皇后各一首

伏以祗紹聖圖思隆國本選繇恭邸俾踐儲闈主壘有  
嚴承祧是屬若時盛舉必契靈心

安穆安恭皇后殯宮祝文

有子而賢升儲惟允眷言在昔常著母儀既闕東宮益

懷中閩式陳嘉薦維以吾虔

淳熙二年

安穆皇后安恭皇后殯宮禁地內置立封堦并

修蓋館舍動土祭告祝文

二首一詞閏九月十二日

維淳熙二年歲次己未某月朔日皇帝

御名

恭遣某官

昭薦于安穆皇后郭氏安恭皇后夏氏自閉長秋久安  
窀穸園域之內繕修以時庶役將興淑靈其妥尚饗

加上光堯壽聖憲天體道性仁誠德經武緯文

太上皇帝壽聖齊明廣慈太上皇后尊號冊

寶奏告天地

二首  
社稷  
首

太乙宮祝文

一首

並同  
詞

維淳熙二年歲次乙未某月朔日嗣天子臣

御名

伏為

太上皇帝聖壽無疆新歲七十將以十一月一日奉冊

寶加上尊號曰先堯壽聖憲天體道性仁誠德經武緯

文太上皇帝并加上太上皇后尊號曰壽聖齊明廣慈

太上皇后謹遣某官敢昭告于昊天上帝伏以天佑我

家丕延親壽念非訂羣議揚鴻徽則何以上符帝心下  
副民願式涓日至並衍尊稱先期告虔庶格靈鑒尚饗

奏告太廟別廟景靈宮祝文

太廟別廟共一十四首景靈宮三首

已上並同天地等詞內  
別廟安穆安恭二首

祭告安穆皇后安恭

皇后殯宮祝文

各一首

茲者天祐君親丕延壽祉載崇盛典並上鴻名國有大  
慶先期以告尚饗

淳熙三年

仲春補種安穆皇后安恭皇后殯宮祝文

木拱瑩園器陳殿宇歲當春仲補治有常體魄如存其  
安于是

太陽交蝕祭告祝文

維淳熙三年歲次丙申三月丙午朔嗣天子御名謹遣

某官敢昭告于大社伏以維暮之春太陽交蝕日官以  
告震畏靡寧雖次舍當然而祈禳敢怠竭誠藏事爰舉  
舊章與抑羣陰遂銷沴氣

太陽交蝕祭謝祝文

伏以季春告朔日有食之方勵寅恭庶銷咎證荷天眷  
頌藪以雲陰期懋厥修仰醕嘉貺

南郊大禮祭告五嶽四海四瀆祝文

四首係  
路通去處

維淳熙三年歲次丙申某月朔日皇帝

御名

伏為今年

十一月十二日謁款于南郊謹遣某官敢昭薦于南嶽  
司天昭聖帝伏以國之大事莫重親祠已卜仲冬載行  
盛禮遯瞻喬嶽作鎮南方先事告虔異孚誠意

東海南海

三歲一郊實惟報本先期誕告今復其時東望洪濤百

川所納馳辭致禱真効珍符

南海改作南望洪濤

江瀆

三歲一郊實惟報本先期誕告今復其時西望岷江百

川所導馳辭致禱真効珍符

太常寺申乞撰修奉安恭皇后下宮神帳板壁

告遷神御權奉安祝文

維淳熙三年歲次丙申七月甲辰朔某日皇帝

御名恭

遣某官敢昭薦于安恭皇后夏氏殯宮設次以安神閱  
時寢深彫剝當治暫從遷御其頤其安

立皇后奏告天地社稷祝文

伏以惕承鴻緒久闕椒房選繇列妃俾聽內治既遵筵  
訓亦協衆心授冊有期預伸祇告

宗廟祝文

伏以祭服之為種稷之獻皆資內助以奉宗祫稟命親



庭自妃而后消辰發冊敢不告虔

景靈宮祖宗諸帝神御祝文

伏以維邦之媛早事初潛登進椒塗蓋遵親訓禮行有日敢不告虔先祖是皇異綏後祿

景靈宮祖宗諸后神御祝文

伏以維邦之媛久冠列妃茲正長秋聿遵親訓前期致告式協舊規有佺闕宮異綏後祿

太乙宮祝文

伏以王假有家天作之合消辰既吉典冊將行仰止壽宮天神之貴兆祥佑福敢不告虔

安穆安恭皇后祝文

自虛椒掖十載于茲爰正坤儀用修陰教前期以告其克知歆

郊祀大禮修整雅飾太廟殿宇等畢工告遷祖宗祀大禮修整雅飾太廟殿宇等畢工告遷祖宗帝后神主并別廟神主還殿室時前奏告

祝文

一十三首一詞內一首懿節皇后同詞

維淳熙三年歲次丙申九月癸卯朔某日孝曾孫嗣皇

帝臣

御名

謹遣某官敢昭告于祖宗帝后伏以躬郊之

歲款廟為先前戒工徒飾修殿宇逮茲訖事神主將還爰擇良辰預伸奏告

安穆皇后安恭皇后祝文

二首一詞  
稱皇帝

躬郊之歲享廟有常預戒工徒飾修殿宇逮今訖事神主將還爰命攸司先時致告

大禮修整太廟殿宇等畢工告遷祖宗等并別

廟神主還殿室正奉安祝文

一十四首一詞  
內一首懿節皇

后同  
詞

伏以國之大事莫重親郊祇率舊章載新祖廟是消吉  
旦還奉威靈永奠安安益敷多祐尚饗

安穆皇后安恭皇后祝文 二首一詞

歲當躬郊載飾別廟速茲訖事還奉神遊歆此精裛安  
于禘室

郊祀大禮前一日朝享太廟差官祀七祀祝文

一首

維淳熙三年歲次丙申十一月壬寅朔某日皇帝

御名

謹遣某官恭祭于司命戶灶中雷門厲行伏以躬郊之  
歲咸秩無文矧如七祀著于祭法前期欵廟并舉舊章  
羣姓億寧茲為受職尚饗

郊祀大禮前二日朝獻景靈宮分詣奏告中殿  
祝文

維淳熙三年歲次丙申十一月壬寅朔某日孝曾孫嗣

皇帝臣御名謹遣某官敢昭告于祖宗諸帝伏以祀事  
之重親郊為先當預獻闕宮之時有分詣帝殿之禮仰  
祈列聖垂鑒忱誠

後殿祝文

伏以祀事之重親郊為先當預獻闕宮之時有分詣後  
殿之禮仰祈懿範垂鑒忱誠

郊祀大禮前二日奏告太祖皇帝太宗皇帝配

侑祝文 二首一詞

維淳熙三年歲次丙申十一月壬寅朔某日孝曾孫嗣

皇帝臣

御名

謹遣某官敢昭告于太祖皇帝太宗皇帝

伏以天施地生被萬方而不宰祖功宗德垂百世以無窮繫勲烈之同符宜郊祀之並侑預伸懇悃仰俟鑒觀尚饗

太乙宮修蓋璇璣觀畢工奉安北斗神像時前奏告五福十神太乙祝文

維淳熙三年歲次丙申某月朔日嗣天子臣

御名

謹遣

某官敢昭告于五福太乙君基太乙大遊太乙小遊太乙天一太乙地一太乙四神太乙臣基太乙民基太乙直符太乙伏以斗有環域天之三辰比歸琳宮載崇像設欽惟太乙館御相望安奉有期併伸祇告尚饗

太乙宮修蓋璇璣觀畢工奉安北斗像時前奏  
告太上皇帝本命殿祝文

維淳熙三年歲次丙申某月朔日皇帝御名謹遣某官

敢昭告于先堯壽聖憲天體道性仁誠德經武緯文太



上皇帝丁亥見生星斗君太上皇帝見生丁亥本命真  
官太上皇帝見生丁亥元辰真官伏以維北有斗乃神  
之尊比飾祠庭載嚴像設瞻言介福之館御欽奉慈皇  
之命元因創新規併伸祇告尚饗

太乙宮修蓋璇璣觀畢工奉安北斗像時前奏  
告今上皇帝太命殿神像祝文

維淳熙三年歲次丙申某月朔日皇帝御名謹遣某官

敢昭告于皇帝丁未見生星斗君皇帝丁未本命真官

皇帝丁未元辰真官伏以維北有斗乃神之尊此飾詞  
庭載嚴像設瞻崇禧之別殿奉元命之列星因創新規  
并伸祇告尚饗

太乙宮修蓋璇璣宮畢工奉安北斗像時前奏  
告祝文

維淳熙三年歲次丙申某月朔日嗣天子臣

御名

謹遣

某官謹上啟三清聖像伏以模七曜之真容雖載新于  
琳宇望三清之勝境初靡隔于瑤霄念設位之有期豈

告虔之敢緩仰繫道蔭並佑民生

太乙宮修蓋璇璣觀畢工奉安神像時前奏告

還北斗神像祝文

維淳熙三年歲次丙申某月朔日皇帝

御名

謹遣某官

敢昭告于北斗陽明太尉府天英貪狼星君北斗陰精

上宰府天任巨門星君北斗真人司空府天柱祿存星

君北斗真冥遊擊府天心文曲星君北斗丹元斗君府

天禽廉貞星君北斗北極太常府天輔武曲星君北斗

天闕上帝府天衝破軍星君并闔觀之神伏以維北有  
斗象垂太微運平四時斟酌元氣君人奉若其敢弗欽  
比新琳祠寅事真像涓期安奉預布誠悰

太乙宮修蓋璇璣觀畢工奉安北神像祝文

同前

伏以斗運天中臨制四嚮蓋七政之樞機陰陽之  
元本也必尊崇奉乃格福祥茲營新宮嚴飾晬表安神  
伊始敢不告虔

佑聖觀奉安時前奏告祝文

維淳熙三年歲次丙申十二月壬申朔某日皇帝

御名

謹遣某官敢昭薦于佑聖真武靈應真君伏以肇營潛  
邸改創琳祠專奉威神冀綏福祉消辰移御預告吉蠲  
尚饗

佑聖觀正奉安祝文

伏以考卜殊庭欽崇像設日時既練安奉有初家用平  
康民無災害舉繫神貺庸致誠祈

進呈安奉仁宗皇帝玉牒徽宗皇帝實錄奏告

景靈宮祝文

三月九日

維淳熙四年歲次丁酉三月辛丑朔九日丁未孝曾孫  
嗣皇帝臣 御名 伏為今月九日安奉仁宗皇帝玉牒于  
玉牒殿并安奉徽宗皇帝實錄于敷文閣謹遣某官敢  
昭告于諸帝后於穆仁祖其仁如天茲舉宏綱著之寶  
牒爰暨徽廟久臨丕基舊錄脫遺載加纂集並洎吉旦  
將謹襲藏前期告虔式表誠敬

仁宗皇帝仁宗皇后祝文

伏為編修玉牒成書以今月九日奉安于玉牒殿謹遣  
某官周某敢昭告于仁宗皇帝伏以自天聖迄嘉祐四  
十二年之間積德流慶與夫釀化懿經皆足以傳無窮  
而施罔極茲舉大要著之簡編安奉有期不敢不告

徽宗皇帝并后祝文

伏為實錄院重修實錄書成以今月九日奉安于敷文  
閣謹遣某官敢昭告于徽宗皇帝伏以自靖國迄宣和  
二十六年之間深仁利澤施于當時被于後世者衆矣

頃雖纂錄尚懼缺遺比命史臣載加撰次成書來上將  
襲藏于西清先事告慶式昭嚴恪尚饗

太陽交蝕祭告祝文

維淳熙四年歲次丁酉九月丁酉朔嗣天子

大社不稱臣謹

遣某官敢昭告于大社伏以季秋月朔辰弗集于房茲  
用敬禱百神昭嚴恭寅畏之意尚其致祥消沴永孚佑  
于下民

祭謝祝文



伏以月臨無射合朔應占縈以朱絲具存古制雲陰倏  
合曾不為災致謝有儀敢忘其舊

淳熙五年

安穆安恭皇后殯宮祝文

維淳熙五年歲次戊戌二月丙寅朔某日皇帝御名恭

遣某官敢昭薦于安穆皇后郭氏安恭皇后夏氏瞻言

園域實在近郊歲卜仲春補新易舊有司歲事維以告

虔尚饗

進呈奉安三祖下第六世仙源類譜仁宗皇帝

玉牒奏告青詞

二首

并中後殿祝文

五首一詞十七

日

伏以紀皇室之本支甫周六世次昭陵之德業又浹十年將傳信于無窮宜寶藏之維謹先期致告靈鑒必享

淳熙六年

明堂大禮雅飾太廟時前奏告祖宗帝后祝文

一十三首共一詞

六月十六日

伏以三歲親祠國之盛禮卜茲秋杪大饗合宮預詔攸  
司飾修太室神靈如在敢不告虔

別廟懿節皇后同詞

別廟安穆安恭皇后祝文

各一首

祭祝明堂屬當秋杪瞻言別廟預致繕修茲協舊章庶  
孚靈鑒

權奉安祖宗帝后神主祝文

一十三首同詞

伏以左廟有嚴庀工雅飾暫勤祐主移御別楹真安靈  
心敢肅以告

懿節皇后同詞

安穆安恭皇后祝文 各一首

歲屬親祠圖新廟室肆陳別屋暫安神棲尚其頌歆以  
迄工役

雅飾太廟別廟祭告土地祝文

肇裡總章先裸祖廟消辰維吉葺舊加新土木方興神  
明其佑

明堂大禮祭告九宮貴神祝文 九首 一詞

維淳熙六年歲次己亥九月丙辰朔十六日辛未嗣天

子御名謹遣某官敢昭告于某宮貴神太乙攝提權星  
招搖天符青龍咸池太陰天乙伏以裁成元化陰隲下  
民凡國親祠即壇別祭茲肇禋于重屋敢徼福于大神  
酌天寶之舊儀循祥符之定制庶幾鑒格永底安平謹  
以玉帛牲齊粢盛庶品恭陳明薦于神尚饗

明堂大禮祭大社

并配后土  
勾龍氏

大稷

并配后  
稷氏

祝文

二首

維淳熙六年歲次己亥九月丙辰朔十六日辛未嗣天

子御名謹遣某官敢昭告于大社伏以祀于總章為國

大事缺而弗講垂二十年茲卜中辛躬執圭幣瞻言五

土大稷作五稷神實司之大饗之期適當秋報即壇嚴事祇

薦二精庶其降康以似以續謹以玉帛牲齊粢盛庶品

恭陳明薦以后土勾龍氏配神作主大稷詞同前

神作主尚饗

明堂大禮祭后土勾龍氏后稷氏祝文二首

維淳熙六年歲次己亥九月丙辰朔十六日辛未皇帝

御名 謹遣某官敢昭薦于后土勾龍氏伏以大享明堂

國家盛禮欽惟土正

右稷改作田正

功在生民三代以來世修

祀典申詔執事歲儀于壇屢于豐年于以昭報謹以量

幣牲齊潔盛庶品恭陳明薦作主侑神尚饗

右稷詞同

明堂大禮前一日朝享太廟差官祀七祀祝文

維淳熙六年歲次己亥九月丙辰朔十五日庚午皇帝

御名 謹遣某官恭祭于司命戶灶中雷門厲行伏以王

立七祀著于祭法載于月令其來尚矣茲予大饗合宮

先薦清廟乃命執事旅神于庭各廸有功佑我羣姓尚饗

明堂大禮前二日奏告太祖太宗配侑祝文

維淳熙六年歲次己亥九月丙辰朔十四日己巳孝曾孫嗣皇帝臣御名謹遣某官敢昭告于太祖尊謚皇帝

太宗尊謚皇帝伏以歲屬親祠禮嚴宗祀永懷祖烈實配天明將侑坐于堂筵預告虔于廟室庶綏靈頌以迄熙成尚饗



明堂大禮畢祭謝五嶽四海四瀆祝文

四道  
係路通

去處

伏以合宮親饗景貺駢臻荷天心之頌懷仰神力之陰  
相馳辭無遠致謝有常祈鑒乃誠益孚厥祐

明堂大禮畢祭謝南鎮會稽山永濟王祝文

伏以歷吉季商歲儀宗祝賴天貺施熙事備成頌瞻名  
山近在浙左敢忘昭謝以答靈休

明堂大禮畢祭謝五嶽四海四瀆祝文

係路未  
通去處

十月二  
十八日

伏以此卜季秋肇修宗祀陰陽協應典禮熙成居歆難  
荷于帝臨望秩仰資于神佑恪伸報謝庸達忱誠

明堂大禮畢祭謝安穆安恭皇后贊宮祝文

同

前

明堂盛禮久曠弗行茲以季秋躬執圭幣天地貺施祖  
宗頌歆追念后儀常勤內助塋園在望庸告熙成

淳熙七年

玉牒所玉牒殿安奉仁宗皇帝哲宗皇帝玉牒

前一日景靈宮奏告仁宗哲宗祝文

四月四日

伏以仁心善政著在當時舉要提綱採諸信史成篇來  
上將遂寶藏載念丕懿敢忘久蹈

秘書省分撰欽宗皇帝孟夏朔祭祝文

紹興三十一年

任正  
字曰

維年月日孝弟嗣皇帝臣

御名

謹遣某官敢昭告于皇

兄欽宗恭文順德仁孝皇帝孔懷之感四序所同矧屆

清和昔惟誕月吉蠲以禴追慕尤深謹以某官祇告神  
靈用遵典禮尚饗

太師大寧郡王吳益出殯祭文


維乾道七年歲次辛卯三月乙亥朔十日甲申皇帝遣  
某官致祭于故太師大寧郡王吳益之靈惟靈襲度外  
家逢時中興躬循法度安享寵榮爵列五等位極三旌  
眷禮之優戚畹莫京先民有言權盛好傾嘉我元舅不  
汰于盈柔惠且直景周之申明戒好謙師漢之嬰謂當

百年壽考康寧中道遽殞何辜於神卜筮來成牆翬將  
行不有遣奠孰昭至情爾毅維嘉爾酒維清詞以侑之  
悲哉我心尚饗

皇子魏王愷殯曆興靈祝文

淳熙七年  
三月二日

維王之德忠孝慈仁何辜于天遽奪之齡計聞雖久彌  
惻我心涉江而東仁祠邃深姑即殯塗以棲女神遺宵  
有奠寓哀斯文尚饗



文忠集卷一百十七

欽定四庫全書

集部

文忠集卷一百十九

詳校官庶吉士<sub>臣</sub>李傅熊

主事<sub>臣</sub>呂雲棟覆勘

總校官進士<sub>臣</sub>楊懋珩

校對官學正<sub>臣</sub>李巖

謄錄監生<sub>臣</sub>李元位

欽定四庫全書

文忠集卷一百十八

玉堂類藁十八

宋 周必大 撰

上梁文

春端帖子附

淳熙二年

修蓋射殿門上梁文

十二月二十二日

兒郎偉我國家南巡吳會北望汴都雖當行殿淹留之  
時豈廢路朝闔闢之制度漢宮之萬戶侈心蓋異於建



章新魯國之雉門舊事姑仍于兩觀恭惟皇帝陛下躬  
儉勤之德懲營繕之勞舜其大智也與常切達聰之念  
禹吾無間然矣每安卑室之居惟臣隣出入之塗繫夷  
夏觀瞻之體是因農隙爰督工程君門九重以高為貴  
王宮五雉不日而成憲閭闔於中天映杲恩於東闕步  
欄翼展蓋瓦鱗差鷓尾對張一洗鬱攸之氣虹梁雙舉  
載嚴壯麗之威欲相懽謠盍形善頌

兒郎偉拋梁東春日稱觴德壽宮上閤門開初拜表從

今入賀永無窮

兒郎偉拋梁西宮堯絳闕五雲低行封函谷一丸土不  
望蘓公十里堤

兒郎偉拋梁南明堂舊位可稽參八蠻那得窺階陛門  
外猶將列子男

兒郎偉拋梁北兩傍執法星環極重開金馬賸儲才未  
許冠猴輕履闕

兒郎偉拋梁上十九章歌開誅蕩天近疑成白玉樓日

高常射黃金榜

兒郎偉拋梁下路門有伉符周雅駕鸞由此入充庭燕  
雀何須來賀厦

伏願上梁之後兩宮等乾坤之久萬宇同仁壽之躋戲  
穀駢臻於銀榜英髦畢班於金闥夷贄叩閭可使環觀

臯庫應星芒順軌固應遙避角亢

音剛氏

皇帝萬歲 皇帝萬歲 皇帝萬萬歲

淳熙六年

後殿上梁文

六月二十九日

兒郎偉三吳勝地萬乘行都華蓋紫垣孟煥東南之王  
氣神州赤縣將還西北之舊京惟是便朝固宜壯觀闢  
門庭而四達徹棟宇以一新雖卑宮神聖之本心抑廣  
廈國家之彛制皇帝陛下恭已正南面為政如北辰繼  
明照於四方久化成於天下自朝至于中昃用咸和於  
萬民眷言丹地之居上憲清都之象聽朝決事兼汴都  
延和崇政之名論道談經殆炎漢虎觀金華之比儻未

臻于闕麗疇仰稱于尊嚴陳臬置圭掄材飾匠千楹萬  
栱既是斷而是虔左城右平蓋弗奢而弗陋茲載洎于  
吉旦爰對舉于修梁博採歡謠發為善頌

兒郎偉拋梁東聖主勤民涖法宮杲日未昇甌瓦碧祥  
雲先捧御袍紅

兒郎偉拋梁西仁覆多方壽域躋可但版圖還渭汭固  
應冠帶被羗氐

兒郎偉拋梁南百辟晨趨儼佩簪所寶惟賢非貝象有

材必用是榱桷

兒郎偉拋梁北政布辰居元以德堯歷行頌朔易都漢  
威坐裂單于國

兒郎偉拋梁上從此太平端有象星入丁躔曼壽延天  
無風烈殊方嚮

兒郎偉拋梁下瑞應紛綸昭聖化九葉齋房紫玉芝三  
登農畝黃雲稼

伏願上梁之後四海一統兩宮萬年集金屋之嘉祥錫

銅樓之多祉南上北上明堂來五狄之朝西方東方長  
樂盛九賓之禮室考應周家之夢寢成同商邑之安取  
諸大壯以無愆同我太平於有永

皇帝萬歲 皇帝萬歲 皇帝萬歲

立春帖子

乾道七年

太上皇帝閣

五言三首

瑞雪收殘臘和風報蚤春  
祝堯千萬壽常與歲俱新  
溥博參洪造希夷法自然  
鴻名稱盛禮玉冊趨新年  
俗阜登臺樂農祥擊壤謠  
何人知帝力爾極聽垂髫

七言三首

青陽布治周二紀黃屋非心正  
九年聖子有為今出震  
天公不宰舊乘乾

東郊何必舞雲翹太史休勞望斗杓  
欲識皇都春色動  
兩宮和氣舜承堯



闔巧花枝金剪幡誇多采縷玉為盤君王賸欲娛佳節  
總把時新輟大官

太上皇后閣

五言三首

化國春偏好慈闈日自長仙韶喧法曲齊勸萬年觴  
白玉重鐫冊黃金再鑄章宮中饒樂事大典對春陽  
永津西湖裏人遊玉燭中非闕風習習端為樂融融

七言三首

徽音有永坤寧殿內助無窮德壽宮未問天桃與穠李  
先須歌詠二南功

東風一夜轉熙臺日上瑤池綺席開可但六宮環佩響  
重孫滿眼賀春來

湧金門外風舒柳師子園中日放花何事東皇催暖律  
似迎西母探春車

乾道八年

皇帝閣

五言三首

日向皇都永永從  
泰液融八荒開壽域  
萬國轉春風  
綵勝年年巧椒盤  
歲歲新君王千萬壽  
長與物華春暖律  
催花蕊晴暉活柳枝  
發生雖有信造化本無私

七言三首

翠輿黃繖下祥曦  
德壽宮中奉玉卮  
天上融怡和氣滿  
人間那得不熙熙

延英議政恰朝還  
選得觀書肯暫閒  
晝漏稍稀高閣報

教添內引兩三班

淑氣潛飛玉琯灰無情草木得先知一如聖主行仁政  
晨發巖廊夕海涯

淳熙三年

太上皇帝閣

五言三首

溥博仁由性誠明德乃真豈能名蕩蕩聊與萬方春  
莫訝東風蚤元從太極來臘寒猶半月花已滿頭開

字闕  
黃金勝酥闕  
白玉盤不須誇百巧只闕

七言三首

闕

一聲爭理鬢

官家來奉萬年卮

聚景園林花萬重  
外家車騎極雍容  
應譏漢戚多驕恣

馬后徒勞戒濯龍

淳熙四年

太上皇帝閣

五言三首

去年春日盛七十慶儀新  
今歲從頭數重過一萬春  
欲識通明殿須看德壽宮  
聖君朝聖父雲捧兩袍紅  
有道春偏好無為日更舒  
齊心大庭館何處覓華胥

七言三首

氣衝魚鑰啟金扉  
風射蛟冰泮玉池  
從此苑中多樂事

和詩誰是沈佺期

樓名聚遠倚晴空無限風光入坐中豈是帝家侈帝力  
由來天子即天公

大巧都無迹可闕春來物物自芳菲不因親御香山賦

誰識當年造化機

太上皇帝近書白居易  
大巧若拙賦賜夏執中

太上皇后閣

五言三首

銅史供新歷壺天報蚤春桃花開閨苑柳色動瑤津

興慶唐儀重東朝漢會尊帝家春更好日月照乾坤  
彤管播徽音年年如佐文向來長樂注溢美謾紛綸

七言三首

舊疑莊叟大椿年一度春回歲八千今見東皇與西母  
誰言此語是虛傳

清曉鳴鞘下紫宸玉觴椒酒壽雙親袞衣更得禕衣助  
搃道新春勝舊春

兩宮勤儉婦承姑鋪翠銷金舉世無  
繭館親蠶家法在



民間應有袴兼襦

淳熙五年

太上皇帝閣

五言三首

玉燭重開歲璿杓復建寅誰知康壽殿四序只長春  
殿閣無為日朝廷有道時椒浮重醞酒花發萬年枝  
手把蟠桃植何勞羯鼓催從今三萬歲十度看花開

七言三首

一年好處是初春十閣爭先奉聖人綵勝寶幡簪帽巧  
蘭芽蔬甲簇盤新

官家閱武向茅灘供帳都亭看凱還鳳輦過門親獻壽  
春風先已滿人間

湖上春光次第還夾街新展集芳園定知花木開偏蚤  
慣識東皇造化恩

太上皇后閣

五言三首

綵勝宜春字流霞曼壽觴塗歌并里詠地久對天長  
閨苑紅初露瑤池碧半涵春生從太極化洽本周南  
聚景貯壺春仙闕畫不局小桃無數發好幸綵霞亭

七言三首

郁郁紛紛三素雲元君朝帝慶新春瓊樓玉女爭迎拜  
應許雙成侍綵輪

柳色花光動建章從今步輦日尋芳亭亭紅繖隨黃屋  
萬里馳驅笑穆王

蚤正中闈婦道成曾禪內禪母儀新如今永與勛華主  
共享千春及萬春

淳熙六年

皇帝閣

五言三首

新歷清臺正寬書薄海同斯民如草木一一被和風  
紫禁風光早深仁奪化工試看澄碧殿池凍已全融  
選德庭前柳朝來漏泄春等閑施御箭穿葉捷於神

七言三首

新歲階蓂九葉芳  
乾元用九應春陽  
九州元載中興主  
九牧行稱萬壽觴

昕陛延賢日徹曛  
金蓮閱奏夜常分  
餘閒手點唐文粹  
春晝長時分外勤

景龍學士賦新詩  
剪綵宮花插鬢歸  
何似未央深駐輦  
教吟春日得春衣

皇后閣

五言二首

儉德聞中外  
徽音繼葛覃  
化行人自勸  
何待講親蠶  
春入坤寧殿  
天桃暖正饒  
直緣心不妬  
豈為壁塗椒

七言三首

何事新春勝舊春  
陰陽順序國安榮  
坤元永贊乾元大  
月色常修日色新

新年佳節喜相重  
屈指元宵五日中  
雪柳巧裝金勝綠  
燈球斜映玉釵紅

千柱沉沉外第成，翟車拜廟禮容新。  
進賢自昔無私謁，錫寵從今不計春。

端午帖子

乾道七年

太上皇帝閣

五言三首

此日天中節，它年赤伏符。  
只因昭火德，不為記荆吳。  
浩蕩天同泰，清虛日自長。  
誕辰纔半月，因以頌無疆。

衣進含風葛觴稱垂露漿更纏長命縷仍泛引年菖

七言三首

再興炎祚撫華戎成就南訛長養功仁似薰風來不斷  
壽如午景恰當中

離明自昔照乾坤太極如今道更尊和氣致祥禳百沴  
艾人桃印謾垂門

槐夏風清麥已秋三千珠翠從宸遊玉階闕採忘憂草  
水殿臨觀競渡舟



太上皇后閣

五言三首

艾葉雙人巧  
菖花九節榮  
玉皇膺曼壽  
金母共長生  
池藥風烟淨  
壺天日月長  
寶書繙葉笑  
碧穗裊爐香  
得道本無為  
加餐亦應時  
瑤盤初薦朮  
玉食更蘆龜

七言三首

檻有榴花沼有蓮  
瑤池歡宴晚涼天  
一年一度為重午  
此去應須過萬年

暑衣初進滿宮牀  
霧縠雲綃五月涼  
化洽周南無一事  
尚吟締綌葛覃章

清曉宮中獻綵絲  
盤龍結鳳闕新奇  
欲教嬪御知勤儉  
閒說當年繭館儀

皇帝閣

五言三首

令月初登泰嘉辰  
舊沐蘭宸心思解  
愠時取舜琴彈  
赫日中天正清風  
養物深葵傾多士  
志草偃萬方心

殿閣南薰細宮壺晝漏遲皇恩隆宰輔賜扇御書詩

七言三首

縷繒採藥謾區區誰似君王用意殊仁政便為醫國艾  
德威那假辟兵符

御前曾刻百篇書可但常被無逸圖二帝三王俱寶鑑  
江心百練定何須

嘗記唐家逢五日近臣藩鎮貢衿盤吾君敦朴母來獻  
却疊香羅賜百官

淳熙三年

皇帝閣

五言三首

扇暘仁風廣  
蠲煩瑞露灑  
萬方沾潤澤  
安用沐蘭湯  
唐代重茲辰  
王公各貢珍  
忠誠惟李泌  
只欲獻其身  
講勸停西學  
蕃休寓北門  
隆儒心不倦  
夜夜賜冰盆

七言三首

暑衣先進聖  
皇宮時服分  
頌百執同惟  
有清躬衣澣濯

更令蠶織被華戎

東城謾祀漢蒼梧南楚空憐屈大夫何似賢才徧中外  
自然朝野足歡娛

水殿開筵酒泛蒲冰盤進膳黍纏菰六宮莫度新翻曲  
只詠明州瑞麥圖

淳熙四年

太上皇帝閣

五言三首

剪舌雙鵠鶴朝來學語新  
祝堯千萬壽歲歲樂端辰  
桃結千年實蓮開十丈花  
蘆香并槿茂應笑阿瞞家  
寶篋裁新樣團團玉柄寒  
御書真翥鳳仙女莫乘鸞

七言三首

康壽高居德壽宮  
天申元自近天中  
千秋行獻開元鏡  
五日先供揚子銅

美景良辰二聖歡  
時新絡繹走瑯盤  
固應慈孝移風俗  
安用臯羹賜百官

抱朴傳方定不虛日中試覓小蟾蜍君王萬歲從今數  
看汝他年領下書

太上皇后閣

五言三首

霧縠含風細雲綃疊雪香雖膺天下養猶服澣衣裳  
椒殿南薰遠蓬壺清晝長黃庭書蠶紙筆法似慈皇  
瑞雀巢珍木雙雙枕石圓翠娥誰採得傳旨賜金錢

七言三首

聚遠樓頭面面風冷泉亭下水溶溶人間炎熱何由到  
真是瑤臺第一重

十椽水殿枕湖流時從東皇御畫舟楚俗不須誇競渡  
新荷香處且夷猶

午節人傳百藥良三千玉女闌羣芳銷憂萱草名空美  
長樂宮中樂更長

淳熙五年

太上皇帝閣



五言三首

今月三長正昌辰五日端艾髯張繡戶菰黍簇金盤  
午位符炎德真人感赤精誕彌佳節近四海祝長生  
嘒嘒蜩鳴柳飛飛燕拂簾堯階無一事象戲戰斜尖

七言三首

日到蓬戶已自長身閒那更傲羲皇薰絃舊解無窮愠  
翠脯今搖不盡涼

昌歎隨宜泛綠醪  
光依舊寫黃庭  
壽康莫採三年艾

瑞應從敷五莢瑩

清暉亭畔吸光亭入眼湖光分外明豈是荷花似雲錦

都緣寶墨照簷楹

二亭在西湖  
太上御書牌

太上皇后閣

五言三首

命縷五絲長菖醪九節香堯年方有永文母共無疆

赫奕庭賓月宮庭樂事頻便從端午節排當過天申

禁中

以置酒為排  
當當字去聲

對席瑤池宴憑欄競渡舡薰風清漏坐鈎月夕侵筵

七言三首

水晶宮闕淨無塵姑射神仙綽有真寶錄自應表萬善  
冰臺安用結雙人

兩宮眉壽古來稀節物年年盛禁闈桃印巧鐫蟲篆古  
艾釵斜映虎形威

炎官火傘謾高張心靜何妨五月涼百和暖添香篆永  
一編徐展道經長

皇帝閣

五言三首

令節傳千古休祥屬聖時  
炎圖如日永赫赫照華夷  
民壽休頌求人淳罷賜臬  
堯賢不遺野楚些豈勞招  
薰殿午風清金盤滿貯冰  
願言均此施四海滌煩蒸

七言三首

日長珠箔漏聲踈案上蘇  
文恣卷舒時有佳篇符睿  
思便將團扇作行書

攬衣切切念絲棼當饋孜孜恤暑耘今歲麥收蠶又熟  
萬方何以答吾君

三殿晨開錫宴初大官順節進龜魚微臣筆力慙燕許  
謾賦羣官上玉除

皇后閣

五言二首

寶典推重五歡聲沸六宮等閒調寶瑟聊助舜琴風  
何處宜佳節風光大內家爭新九子綵競巧五時花

七言三首

筒黍嘗時思獻桂綵絲繫處憶親蠶  
女紅躬儉今猶昔  
應有詩人賦二南

逮下深恩浹後宮  
斯螽五月詠幽風  
麝香草闋宜男綠  
安石榴簪多子紅

尚醞潑醅瓊作液  
湯官屑粉玉為團  
常娥應侍天公宴  
一曲霓裳即廣寒

淳熙六年

太上皇帝閣

五言三首

午節由來重令符  
火德昌炎圖常有赫  
聖壽共無疆  
甲庫供團扇宸毫御  
古詩龍蟠仍鳳翥  
誰數晉義之  
境勝日偏長  
心清夏更涼  
超然元覽處  
何止傲義皇

七言三首

三紀躋民壽域中  
艾人桃印本何功  
如今坐享無窮報  
幾看龜巢蓮葉紅

聞道天公近效竒，澗松特長萬年枝。  
蜿蜒正作祥龍舞。

移得清陰覆玉墀。

近自平江移古松  
甚竒怪正如龍形

節通天申競祝堯，官家重疊賜輕綃。  
自然舜孝移風俗。

寓意泉羹鄙漢朝。

### 太上皇后閣

#### 五言三首

令節仍豐歲，宮闈樂事全。  
千祥并萬壽，善頌入薰絃。  
積雨收梅夏，清風度麥秋。  
六宮爭獻壽，不覺月沉鈞。



丹篆釵符小朱絲臂縷鮮都無邪可辟祇有壽方延

七言三首

問安勅使馬如飛絡繹時新奉母慈蜀產吳包何足道  
蟠桃熟處是瑤池

揮箠將如解愠何層冰列鑑謾戕戕要知心地清無暑  
端為全鍾四氣和

粉團菰黍簇金盤仙朮昌陽灑玉樽小小角弓誇射中  
兩宮歡燕似開元

欽定四庫全書



文忠集

二十一

文忠集卷一百十八

卷一百十八

文忠集卷一百十八